

國  
朝  
詞  
綜  
補

國朝詞綜補卷十五

無錫丁紹儀杏船齋

毛大瀛一首

馬景成一首

程衛芳三首  
補詞

吳元潤七首

王廷言一首

朱黼三首  
補詞

孫慰祖二首

徐本禮一首

鄭辰一首

丁瀚六首

沈蓮生一首  
補詞

熊寶泰三首

荆鳴昌一詞  
補詞

張春苞一詞  
補詞

金瑚二首

邵豐城二首  
補詞

蔡廷泰

一首

石熙載

二首

周開

一首

姚階

一首

楊之灝

二首

方正澍

一首

吳文溥

一首

吳闓

一首

王岱

二首

汪繼熊

一首

補詞

李日華

一首

陳珏

一首

惠承全

二首

儲潤書

一首

華文炳

一首

毛大瀛

字海客寶山人諸生官簡州知州嘉慶初勦賊殉難

百字令

題竹巖孝廉明新雙鬟伴讀圖

曲闌干外有碧梧。高聳綠蕉低亞。小坐攤書涼意足。正  
好風前消夏。香麝龍涎茶烹鳳餅。餘興揮毫罷。雙雙紅  
袖橫波暗轉嬌蛇。對此小小唇朱。鸞鸞眉翠。綽約真  
如畫。只隔一痕青玉案。便近越羅裙袂。半臂修書澹妝  
侍閣。誰是忘情者。銀缸背處。桂香何況新惹。

馬景成

字承天金匱人貢生官  
天長訓導有半湖詞

步蟾宮

月中秋半圓光凍。做不起廣陵幽夢。裊花枝。俏影可人  
憐。風過也。砧聲遠送。一輪明月天涯共。悵望處寒侵  
衣縫。倩西風。雙雁報香閨。休長倚闌干露重。

程衛芳

字箕浦歙縣人官廣東知縣有蘭阿詞

謁金門

簾乍揭一片兔華澄澈斜映魚雲千萬葉石闌濃露滑  
幾陣藕花香絕時有游魚輕暖心事短琴難細說簾  
紋清夢接

蝶戀花

樓角青山渾不辨薄暮憑闌冷絮團成片一夜蘭缸還  
自翦風枝冰瓦寒聲顫雲外天雞侵曉喚枕倦重溫  
夢去江南遠漠漠古香生石硯初陽已炙松窗徧

過秦樓

仲夏散園兄招同史梧岡儲石亭李桐源家尊江暨晴嵐姪集桂菴書屋

重碧捎簷淺朱窺砌茅屋幾椽深峭閒拋蠹帙小約吟  
朋石徑亂雲初掃彈罷長晝殘棋闌外熏風儘容舒嘯  
漸甘分茗盃涼生椶拂午曦難到空憶取越女菱謳  
吳船漁火等是倦遊將老琴邊寄怨夢裏探幽一院鳴  
蛩催早待看桑落櫟開雨點翻荷月痕流沼問南園聚  
否松閣茗華綻了

吳元潤

字澤均號蘭汀長洲人官  
輝縣知縣有香溪瑤翠詞

相見歡

東風自識紅樓撼簾鉤驚起棲香雙燕語春愁吹紅  
雨飄香絮若爲留不及盈盈春水繞蘭舟

洞仙歌

小樓連苑是藏春深處玉洞雲環綵鸞住望絳桃遮徑  
紅藥翻階那能許新燕拂簾輕度 夙因真未料偶入  
仙源拂柳無端聽鶯語如幄翠陰濃鈿影釵光偏隔著  
一重花霧又歸去瓊扉太匆匆只煙柳悠揚繫人愁緒

又

慙慙無緒正年年三月况又文園本消渴任鶯簧囀樹  
燕翦穿簾誰相憶擁被悄眠悽絕 密香雲外至蘭語  
丁甯輕暖輕寒自珍攝料理苦吟身多謝雲仙尙憐取  
腰圍瘦怯便彷彿維摩散花人早解盡迴腸萬重愁結

摸魚兒

到而今水流花謝酒懷琴趣都減年華錦瑟愁中度  
有別魂消點苔閣掩自子夜歌沈誰向金鋪撼燈昏雨  
暗任熱盡龍涎滴殘虬箭怕拂竟牀簾 煩襟鬱苦憶  
風亭露檻一枝初撚穠豔空華只似優曇現莫道蓮心  
曾染縈百感歎此恨綿綿不比歡遊暫浮光荏苒縱悟  
徹前因猶憐影事何日冶情燄

疎影

湖樓夜雨寄懷張少華

雲窗霧閣看水煙弄暝低映羅幕敲枕愁聽點滴簷聲  
向晚乍停還作芙蓉初發秋容好怕一夜粉凋紅落誤



曉來畫舫西泠幾處醉花芳酌 那更蕭蕭敗葉撲簾  
驚夢斷頻感離索賸有疎鐙伴我微吟和徧泠泠風鐸  
遙思素侶分襟久定相憶客蹤飄泊又怎知未了清遊  
鎖把玉驄閒卻

眼兒媚

夢中尋覓覺來空不道乍相逢海棠深徑衣香翦翦襪  
印弓弓 含情卻看籠鸚挂絮語諒難通銷魂此際眉  
凝寸碧臉暈微紅

祝英臺近

園居春晚有懷竹嶼兄時客武林

竹風輕花露滴暝色映簾箔手拓西窗誰與共琴酌喚

愁葉底鵲聲暗催春去渾不管倦懷寥落 歎離索幾  
回夢繞池塘相思渺難託夜雨聯牀空憶舊盟約思君  
門掩孤山倚闌吟徧對滿院楊花飄泊

王廷言

字顧亭婺源人官順  
德知府有蔬香樓詞

水調歌頭

壽袁子才八十時爲公子合巹

上有介眉酒下有合歡卮快哉起爲公壽欲醉且徘徊  
休問花閒歲月但看山中事業八百手栽梅歲歲二三  
月顚顚子盈枝 公莫笑我亦是古之稀別無一事堪  
喜喜得尙知幾輪卻十年以長能唱千秋之曲憑几試  
聽之聊以代金石吹竹與彈絲

朱

黼 字畫亭江陰人貢生  
官教諭有紅豆詞

點絳脣

鶯老花殘畫屏開處愁無那綠雲暗鎖梅子枝頭大  
嬾倚闌干終日熏香臥黃昏過羅幃一箇背著銀缸坐

祝英臺近

卷殘雲銷宿雨相望碧天暮傍水誰家繞徧綠楊縷小  
門半掩還開依稀倩影恰風送歌聲輕度 暗凝佇此  
曲往日曾聞啼痕尙堪數今我重來檢點舊愁緒早又  
明月臨風春星當檻問此際那人何處

輓轡金井

催回短夢聽蕭蕭閣外雨聲多少轉枕舉帷剔蘭膏  
燄小難禁料峭和一片蛩吟衰草不似從前梧桐無賴  
新寒報早依然是繫情未了奈空階長夜由他飄掃  
料得兒家更誰憐悲悄而今錯道都只是啼紅吹到  
作盡秋聲飛來旅館把人驚覺

孫慰祖

字耕田仁和人  
官鹽城知縣

百字令

題竹巖薩尹明新雙鬟伴讀圖

沈沈院落正紅蕉展  
薜碧梧凝露雙燕穿簾窺宋玉人  
在綠天深處汗簡初開唾壺漫擊亦莫歌金縷  
吟聲釧韻相期長伴朝暮  
好待咏罷香奩重修新史怎忍釵

分股似水華年如夢境留得畫中眉嫵一霎前塵十年  
舊恨怯向尊前訴休嗟泡影卻欣丰度如故

意難忘

贈友

日暮雲遮聽聲聲孤雁點點棲鴉添香燒菰葍拈韻鬪  
尖叉風蕭瑟月橫斜臨別轉含嗟憶舊遊不如歸去我  
亦久離家 湘江未許乘槎漫挑鐙夜坐同話桑麻輕  
盈修竹葉屈曲小梅花三盞酒一杯茶這清味堪誇最  
恨是片帆早掛腸斷天涯

徐本禮

字沐雲鄞縣人貢  
生官分水教諭

百字令

廿四橋

橋橫廿四算千年來是繁華如此十萬絳紗圍繞處不  
少吹簫仙子荳蔻梢頭荼蘼枝外明月流香水青樓夢  
好饒他蟻國槐市誰許書記紅燈重城不鎖夜入平  
康里十二珠簾鉤盡下沈醉紫羅幃底別酒三行密箋  
一匣無恙君歸矣憐才若是似君我願爲死

鄭

辰

字三雲慈溪人  
官江蘓通判

千秋歲引

壽隨園先生

江水添波鐘山聳翠似爲先生介眉壽頻年戲遊屨五  
兩歸裝檢點詩千首看名園好花竹倍森秀曾徹金  
蓮欣白首曾撇木天拖青綬贏得鴻名徧人口丹成大

還屏不御攜樽笑飲立亭酒喜追陪八旬叟顏如幼

丁

瀚字默甫無錫人官甯羌知州有西園贖稿附詞

胡欽填諱

鵲橋仙

輕雷送雨涼颼餞夏一榻清虛無暑果然茗飲勝杯香  
量水倚疎簾自煮塞鴻將到林蟬乍歇又聽擣衣砧  
杵微吟欲覓和人難只索向秋蟲細語

臨江仙

州署東偏新闢小園成春日偶題

絲雨愔愔飄未已遙山半被雲遮小園堪擬庾公家數  
竿君子竹一徑美人花清晝垂簾無箇事茗鑪閒試  
新茶眼前生趣足相誇燕兒營厦屋蜂使放朝衙

踏莎行

望雨

瓦雀鳴春窗雞報曉捲簾薄霧籠幽草山家正在望甘  
霖鳩啼屋角聽來好潤葉愁微霑枝恨小東風莫把  
濃雲掃年光輸與柳條多依依不覺春將老

南歌子

細雨梅花路輕風燕子村半篙綠水護柴門別是一般  
春色最溫存遠翠含餘潤殘紅褪舊痕往時闌檻共  
誰捫禁得杜鵑聲裏又黃昏

高陽臺

秋夜聞笛

晚照留紅寒煙弄碧金飈吹滿江城倦倚雕闌誰家玉



笛飛聲梅花落盡人何處便無愁也喚愁生況涼州別  
調新翻越樣淒清 柯亭舊韻何堪問牘關山月色千  
里同明喚恨桓伊催教繡閣心驚陌頭楊柳蕭疎甚頓  
牽來無數離情又長空塞雁爭飛相和悲鳴

月華清

七夕前一日雨中漫賦

葉下空階荷殘曲沼愁看一徑絲雨又早鸞梭罷織鵲  
橋將具數年年瓜果紛陳枉企想良緣佳遇休誤縱神  
針奇巧嫁衣空作去聲 自昔蛾眉招妒且養拙安愚休  
嗟遲暮上得靈槎始信銀河有路望黃姑消息非遙悵  
青鳥音書難度情慙翼雙星來夕淨祛雲霧

沈蓮生

字蓮亭平湖人官阜陽知縣有香草漢詞

望湘人

秋夜不寐倚枕成吟不自知其淒咽也

甚簾衣織暝琴薦抱涼夢回清潤如雨漸咽疎蛩更催  
遠杵換了吟蟬前度髡柳荒荷斷橋曲港無尋秋處又  
怎知秋在南樓暗帶雁聲飛去 憔悴天涯倦羽料蘆  
漪月冷未迷歸路認蘋葉蘋花只有舊愁無數苔磯鷺  
管釣船沙護試與重尋煙語怕醉後棹入蒼茫一笛漁  
天吹暮

熊寶泰

字芸眉潛山人諸生有藕頤類稿附詞

憶王孫

一春別恨壓眉尖，瘦損芙蓉掩翠奩。  
盡日春寒不捲簾，悶懨懨，金鴨香殘懶更添。

步蟾宮

用蔣捷體

爲誰溼透臨風袂，全不辨露珠珠淚。  
重來憔悴是崔郎，怕花下、小門深閉。  
當時獨擁黃綢被，隔著箇窗兒無寐。  
而今依舊是相思，更添了別離情味。

滿江紅

泊楊子江寄喬璞園

楊子江頭掛十幅蒲帆，無恙任揚舲。  
擊汰浪高風漲，泉品中冷，頻汲取。  
山園北顧多雄壯，聽茶鐺、一夜煮江瀉。  
輕煙颺，漁燈澹波心漾，雞聲惡。  
中宵唱念故人何處。

天涯悵望車轍只餘螳臂在竹竿空使鮎魚上笑頭顱  
如許滯江鄉眞無狀

荆鳴昌

字若貢丹  
陽人諸生

蝶戀花

聽說傷心今又去著意丁寧盡是銷魂語別後春歸留  
不住落紅偏傍闌干聚芳草迷煙聞杜宇雁影沈沈  
誰與傳書素數徧歸期重又數畫橋柳線纔飛絮

張春苞

字竹如歸  
安人監生

百字令

翠鈿初整愛盈盈笑靨天然丰格鸚鵡歌調銀管細渾

覺東風無力好夢頻驚香魂欲散含怨聽啼鴉花前暗  
數就中誰是佳客最憐瘦損腰支東陽年少暫醉朱  
絃側重試霓裳勞顧曲彷彿蟾宮相識卻怪檀奴閒厯  
湘管傳出真消息從今腸斷澧蘭愁和吟闕

金

瑚字綺園太倉人諸生

三臺令

聽雨

風雨風雨攪亂夢魂如許窗前不住蕭騷何限愁懷寂  
寥寥寂寥寂更襍沈沈漏滴

鵲橋仙

次內子七夕寄懷韻

寂寥官舍憂愁客思况值雙星歡會離家我已兩年餘

算贏得終宵無寐  
書緘一紙夢懸兩地似隔銀河一  
水不知何日也相逢共細訴孤燈憔悴

邵豐城

字龍光號爛漁嘉善人諸生有蕉隱詞

清平樂

茫茫如此沒箇埋愁地啼鳥驚心花濺淚又是瘦人天  
氣年年誤了春光枉教回盡柔腸獨倚危闌凝睇愁  
邊賸有斜陽

新荷葉

淺碧盆池乍看幾點田田似捲還舒孤莖倦倚風前鉤  
雲貼月漸擎出小小青盤休將拈弄怕他珠碎難圓

饒有清香。勝如花氣堪憐。越女羅裙也應輸與鮮妍。芳  
心展盡。戲相問。何日成蓮。那禁驟雨。聲聲打徹中邊。

蔡廷泰

字虞尊長  
洲人諸生

浪淘沙

薄霧晚雲連。涼夜如年。瑣窗深掩自相憐。蕉雨梧風聲  
不定。作出秋天。幾度託鸞牋。淚溼紅綿。一燈孤影伴  
愁眠。夢裏芳魂如化蝶。飛到君邊。

石熙載

字惠疇吳縣  
人有韻山詞

點絳脣

久雨初晴。一輪皓月明如畫。籬邊花瘦。早是深秋候。

修竹蕭森影射窗紗透休回首新詞填就獨向姮娥奏  
長相思

山無情水無情山水空濛千萬程長空聞雁聲風淒  
淒月淒淒江北江南夢未成相思淚暗傾

周

開

字天中號鐵山  
慈溪人貢生

百字令

登吳山

平生自擬不登高也合置身最上況到吳山高絕處頓  
使心懷開放斗大臨安帶長羅剎空際天風蕩誰將橫  
笛吹來和我孤唱請看天目西來龍飛鳳舞層疊連  
雲障衣錦英雄歸土後霸業何堪回想宋鼎南遷偏隅



僅守漫說皇都壯我今憑弔江山乃爾清曠

姚

階

字芷汀婁縣人諸生

憶故人

題張金治遠春詞

天上張星偶然謫向人間住等閒料理苦吟身寫出銷

魂句古錦囊中堪貯有誰如玉田家數何時共我換

羽移宮重商簫譜

時余方輯詞雅

楊之灝

字簣山婁縣人諸生

金縷曲

家荔裳省兄西秦值其生朝賦詞爲壽

促坐行杯酌祝華年小蘇初度略分今昨

蓉裳以十二月十八日生

前坡公一日荔裳以正月四日生後子由一日計就游梁辭祕省只算暫時休

沐漫惆悵鸞飄鳳泊似我浪遊三十載笑儒冠難悔從  
前錯蠶絲吐苦纏縛茲行况復偕康樂羨同車兄吟  
春草弟吟紅藥眺聽河聲兼嶽色好辦酒瓢詩橐橫短  
笛爲吹飛鶴儂自天涯泥絮滯盼吾宗故事留臺閣名  
山在緩前約

清平樂

題顧松泉東皋蠶月圖

桑陰垂地蠶事三眠起豆熟芹香風日麗最好溫和天  
氣君家家住東皋柴門寂寂誰敲待得同功繭就一  
樽可許相邀

方正澍

字子雲歙  
縣人諸生

祝英臺近

題友人月底修簫譜圖

認飛瓊猜弄玉未許小紅比一種閒情只合擬簫史良  
宵何以爲歡緇梅開了更清冷月華如此按纖指參  
差減字偷聲知他解還未漫羨王褒傳賦漢宮裏惹儂  
悵燭當年看翻新譜一叢竹小湖樓底

吳文溥

字澹川嘉興人諸生

滿江紅

渡海

指點虛無彷彿到達瀛臺殿卻又被輕颺吹去杳然波  
面頃刻滄溟浮六極沃焦無底鼇身轉任孤帆一葉駕  
空行飛如箭殘陽沒餘霞絢水輪湧銀濤濺問東甌

南粵茫茫莫辨江漢西傾連魄動招搖北指回眸見認  
浮雲一抹是中華增悲戀

吳

閬

字浪仙嘉  
定人諸生

祝英臺近

綠楊煙紅杏雨煙雨暗前渡幾疊驪歌曾送遠人去鷓  
鴒啼徧春山萋萋芳草空目斷王孫歸路分攜處賸  
有落日旗亭寂寞甚情緒無賴東風吹出滿天絮何時  
樽酒言歡西窗翦燭再細把離懷重訴

王

岱

字次岳常熟人  
諸生有情田詞

小重山

清明

難得清明客在家疎簾清似水映梨花任他蜂蝶趁天  
斜閒排遣鑽火試新茶雲樹望中賒踏春歸去也關  
鈿車無情芳草送年華銷魂處一碧到天涯

虞美人

珥

垂垂銜耳明璫小映得螭螭好晝眠敲枕夢初驚愛看  
新蟾臉後一痕生宵來卻又忘除去聽盡柔鄉語何  
如脫下放妝臺忍遣一雙金雀兩分開

汪繼熊

字芝亭嘉善人監  
生有語花樓詞

齊天樂

寒鴉

天邊墨點紛無數蕭蕭鯉魚風裏冷踏殘雲乾依枯樹

畫出江村愁意蒼茫萬里剩一線斜陽暖烘雙翅閃閃  
林梢遊人休認酒旗字依稀鬢影可擬訝飛來成陣  
卻似椎髻破曉啼煙衝寒兕雪暗老西風身世荒陂凍  
水只片月淒迷照伊樓止醒枕休聽帶寒聲去矣

李日華

字旭齋嘉興人諸生

百字令

寄顧萊厓

伊人何處盼兼葭渺渺一灣秋水夢落汀洲波潏灩怎  
奈盈盈兩地雁斷霜天鷗眠沙渚淅瀝西風起幽懷誰  
訴隔江千樹紅醉回首南浦依然年年悵別此恨何  
時已立盡殘陽愁幾許望去停雲無際畫裏尋詩詩中

懷友多少銷魂意芙蓉采采相思爲爾頻寄

陳

珏字西霍嘉興人  
諸生有瑞林詞

菩薩蠻

檀槽忍把離愁訴匆匆欲上扁舟去執手淚滂沱明朝  
更若何 滄洲凝望處帆影和雲度微雨又黃昏亂鴉  
歸遠村

惠承全

字枝南長  
洲人諸生

巫山一段雲

嫌道春無力翻添一味慵夢多未放翠衾空料理夕香  
濃 將息閒心性從教掩綺櫳惜花偏惱養花風寒了

紫蘭叢

醉花陰

蜻蜓

翅疊生綃含碧暈玉碾雙眸俊也解繞芳叢小住旋驚  
絕少棲香分銀塘過雨涼陰嫩又見飛成陣幾點水  
燕花風裊綸絲看立亭亭影

儲潤書

字玉琴宜  
興人諸生

滿庭芳

竹巖謹尹重來江左出雙鬟伴讀圖囑題  
尚係十年前所繪展卷慨然爲賦是解

白傅楊枝樊川綠葉當時猶未成陰東風晚晚芳夢杳  
難尋回首讀書庭榭徒惆悵花落春深閒情賦十年拋  
卻緘恨到如今畫圖還省識娉婷左右兩兩同心算



蓬山小劫也。歷升沈試間。重逢何處。拈紅豆空盼青禽。  
須珍重。香溫茶熟。莫漫理瑤琴。

華文炳

字象五無錫  
人有菰月詞

玉樓春

沙棠雙槳輕於葉。搖出前溪山影碧。疎籬短短護新畦。  
細雨濛濛催暝色。踏青挑菜城南陌。悵望前裙人獨立。  
小桃昨夜嫁東風。滿面羞紅嬌欲滴。

國朝詞綜補卷十六

無錫丁紹儀杏舫輯

保大章

一首

黃璞

一首

盧作樑

一首

沈清泰

一首

石芝

二首

沈璧璉

二首  
補詞

曹三選

二首

顧修

一首

吳中奇

一首

石鈞

一首

陳祖望

一首

王昆

一首

李澧

二首  
補詞

任兆麟

一首  
補詞

朱學潛

一首

唐舒

一首

許士奎 一首

吳觀 一首

程寬 一首  
補詞

嚴觀 一首

張大鎔 一首

潘昌 一首

仇鳳梧 一首

吳鏡 一首

黃呈蘭 一首

李汝章 一首

仇夢巖 五首

浦淮音 一首

余尙德 一首  
補詞

田林 一首

費融 一首

魏攀龍 一首

錢東 二首

高桐 一首

雷畹 二首

保大章

字印卿江蘇通州人貢生

桂枝香

小山幽絕是淮南仙去流傳遺跡不比桃枝纖弱柳枝  
柔怯金風昨夜方吹到徧枝頭綴成香屑碧雲深處攀  
緣無路漫思輕折更休將沈檀細爇問無隱真禪有  
誰參徹曾伴姮娥孤另清芬自別黃花老圃秋容好試  
衡量一般高潔賞心最是婆娑相對一丸涼月

黃

璞

字同石順德人監生有戰古堂詞

蘇幕遮

曉度梅嶺

嶺雲深山月小茅店雞聲啼徹天方曉馬上續來殘夢

惜衰草連天眼底梅花少

別離愁鄉國繞昨夜今朝

隔斷東西道薄霧漫空前路渺禁得鷓鴣亂向行人叫

盧作樑

字秋蓼東莞人諸生有陟山堂稿附詞

少年游

沙平草軟馬蹄驕隨意騁金鑣十里鶯花一堤楊柳遮  
映酒旗搖當歡且莫辭沈醉春恨最無聊纔過清明  
又逢上巳禁得幾魂銷

沈清泰

字紫淵里居未詳

夜合花

山塘畫舫卽事

鬢影敲鴉歌塵引鳳箇人悄倚蘭橈尋芳鬪豔冶溪春

色新描曳羅袂。彈金翹。一逢兒。月夕花朝。小名應記韶  
年自數。七里河橋。愁聽暮雨瀟瀟。認取楊枝力軟。瘦  
比蠻腰。心香乍裊。伊家三點絃么。申後約。悔前宵。展墨  
雲紅袖相招。勝他真箇。湘簾翠幕。翠地魂消。

石

芝

字仙圃黃  
梅人監生

憶秦娥

曾相見。碧桃花裏深深院。深深院。有人放出。畫簾雙燕。  
祇今回首空留戀。小闌干外苔成片。苔成片。想應消  
受鳳尖。停徧。

琵琶仙

徙倚層樓。盼鄉路、一片澹煙斜日。可惜豔豔韶光，離懷  
太岑寂。惆悵是、天涯燕子，幾曾到、斷魂簾隙。夢冷銀釭，  
書沈錦字，心緒誰識。漫回首、草綠西園，鎮風雨、匆匆  
送寒食。那更杜鵑聲裏，誤將來消息。休只憶、愁花恨柳，  
怕一春、瘦損詞筆，無奈密意幽情，怎生拋得。

沈璧璉

字梅泉上海人諸  
生有虛白堂詞

浣溪紗

芳草臨風一道斜。夕陽盡處幾人家。玉驄何事向天涯。  
江闊征帆隨雁遠。山高孤店被雲遮。依然門外落桃

花

齊天樂

春感

流鶯聲裏連朝雨，爭禁子規啼。又舊夢如雲，新愁似水，幾度傷春。中酒依依垂柳，算折盡柔條，誰憐腰瘦。味到而今，相思何處，數紅豆。游絲難繫白日，聽悠揚玉笛，淚漣襟袖。鴨卵天開，桃花漲暖，腸斷年前攜手。香羅溼透，指一簇青帘，那堪回首。悄下中庭，落花風正驟。

疎影

高唐道中賦柳

金雞喚曉正風尖，月淡楊柳微裊。斜拂鞭絲，翠映征衫，千行旖旎官道。年來四次高唐路，看樹亦依依將老。更關心昨夜歌聲泥絮，離亭懷抱。正是輕寒時序，碧雲關心，昨夜歌聲泥絮，離亭懷抱。正是輕寒時序，碧雲



三十里悠颺籠罩酒壓花香蟬咽秋聲客裏何堪殘照  
綠陰似幄江南路夢不到飛綿繚繞恨大堤萬縷堪攀  
一望遠天信杳

曹三選

字鳧谷桐鄉人諸  
生有吹雲閣詞

百字令

爲顧君萊厓題鄧尉探梅圖

試隨春去問銅坑銅井濛濛千樹驀地東風蘇病眼吹  
上雪花無數明月前身嬌雲舊夢著箇冰心付商量年  
例一枝幽豔如許 休遣玉笛吹殘酒邊燈畔留伴幽  
人住生面伊誰翻縮本貌出奚囊新句一笑相看虎山  
橋近可似花開路廣平興到還期偕我同賦

水龍吟

用白石體題楊伯夔與鷗爲客圖

十年一夢江湖遠。解道青山如舊。舊盟好在煙寒水闊。幾回招手我亦閒鷗。飄零人海忘機已久。任滿身涼影。一襟幽思都畫出愁時候。難得與君邂逅。且消磨客中盃酒。白沙翠竹秋光澹處。水哉吾友。萬里難馴。安知燕雀復何雞狗。看芙蓉開徧空江。肯爲杜鵑低首。

顧修

字萊厓石門人諸生有讀畫齋詞

百字令

壬子春探梅鄧尉信宿而歸囑馮君秋鶴繪圖題此以邀和者

江南春到想梅花。破臘疎疎盈樹。倦向羅浮尋好夢。何處衝寒閒步。壓雪枝低臨流影。澹消息。駿駿露鞭絲得。

得且循鄧尉山路 一任徑轉堯峯市通光福隨意探  
幽去恰喜清芬來習習休悵美人遲暮小榼三升瘦筇  
七尺遲我題新句滿溪明月愛看疎影徐度

吳中奇

字瘦夫  
吳江人

百字令

顧萊厓探梅鄧尉賦詞索和次韻奉酬

霜風如翦看裁成鄧尉梅花千樹斷澗流澌疎照影宛  
似淩波微步山店雲封茶寮雪霽屋角青旗露茫茫香  
海渾疑山盡無路 最是騷客騎驢奚奴挈榼獨撚吟  
鬚去看到寒深呼半臂不覺花光將暮妙思紛來與梅  
俱化豈減何郎句新詞重按幾番玉笛低度

石

鈞

字遠梅吳縣人諸生

百字令

丁巳新春與王述庵司寇同游鄧尉歸途賦此卽題顧君萊厓鄧尉探梅圖

傳來圖本認分明西磧梅花千樹之子探春曾獨往雪  
後支筇徐步紅點遙林白浮香界一角僧樓露襟懷絕  
俗冷吟行徧村路今我蠟屐招邀東山謝傅攜手銅  
坑去湖上峯峯花斷續看到斜陽將暮折得花枝載從  
歸棹更賭新詞句水邊籬落想君魂夢飛度

陳祖望

字冀子山陰人諸生

百字令

村民墾地於古墓中得方鏡友以相贈且云墓塋大倍近時右側文曰天康元年十二月吉日鏡黝黑如漆背鏤海馬蒲萄細入毫髮爲何人墓中物惜無碑碣可考

方諸一片是秦時明月瞥成千古曾照南朝金粉樣當  
日繁華無數玉樹歌殘燕支井冷斷送風流主驚鴻影  
裏美人多少黃土 今日碧暈苔斑殞宮花落不共秋  
燐腐甚是尋常兒女物偏歷幾朝風雨金盃飄零銅駝  
消歇淚灑仙盤露興亡舊恨倩魂可解相訴

王

昆

字重儀  
吳縣人

蝶戀花

猶記相逢天乍雪曲曲春城纔過燒燈節穿徧迴廊剛  
幾折繡屏斜倚丰神怯 北馬南檣容易別蘭畹花閒  
讀罷情悽切無限幽懷消未得風前羨煞雙飛蝶

李

灋字蘭友嘉興人諸生有意香閣詞

鵲橋仙

蘭芬簾戶鶯聲門巷好會年來曾約相思不遠也銷魂  
最懊惱夢殘燈落雨中花事酒邊愁緒誰省箇人離  
索幾時羅袖許相攜儘教我心花吐卻

南鄉子

題顧萊厓山居讀書圖

汲綆想詩翁小結茅茨六六峯藉免窺園帷獨下山中  
長聽書聲和古松落落寄幽踪閉戶何煩客過從儻  
有閒情翻菊部邀儂三弄梅花一笛風

任兆麟

字心齋震澤人諸生

鳳凰臺上憶吹簫

題散花女弟浣紗詞卷

夢裏談禪醉中學道幾曾堪著浮生訝難傾情海不破  
愁城春色又還如許鐙黯黯冷掩銀屏獨自向窗兒守  
著怎得天明難平古今一例算紅粉青衫總合飄零  
倩新詞翻出幾許幽情妒煞五更風雨驚曉看紅墮簾  
旌清明近憑闌倦聽隔院簫聲

朱學潛

字右陶長洲人諸生有琴餘綺語

望江南

山行好晚景徧郊原綠樹陰濃紅日淡青山路斷白雲  
連溪畔泊漁船

唐

舒

字仲遠丹徒人諸生

虞美人

柳影

非煙非霧春無主，不盡銷魂樹。送君遲到月黃昏，又是滿庭難掃，別離痕。參差不定明還滅，欲贈何堪折者。番情緒已成空，怎怪燕兒頻翦，恰重重。

許士奎

字原士長洲人

踏莎行

晴莎

煙態猶含露華初，沐踏青爭唱陽春曲。萋萋極望不思歸，王孫昨夜誰家宿。細軟如茵，輕柔似縠，落紅點點留餘馥。斜陽一抹映弓鞋，蹴來妒煞裙腰綠。



吳

觀

字半舫金匱人仕履未詳

金縷曲

題楊方叔春草軒詞

我亦生壬戌卻輸君樓成五鳳筆騰五色彈指韶光人  
將老自笑登仙力怯更自愧江郎才竭幸得關西同硯  
友尙未忘舊日吹簫客歌串串教相拍 拚銷幾斗隄  
糜汁寫襟懷不師黃九不知秦七追記蓬萊雲和曲特  
地從頭譜出莫惆悵紅塵小謫一萬卷書三萬路住江  
南到處聯袂履情似海有誰匹

程

寬

字芋塘太原人有雨琴詞

生查子

即次夜感

門外馬嘶頻夢醒家千里一翦透窗風暗落銀釭穗  
客路逐程移飛雁如何至高樹月猶斜殘柝催人起

嚴

觀

字子進上  
元人諸生

滿庭芳

喬寓武昌得小秋姪袁浦來書並餐花館  
詞賦此寄之

仙謫蓬萊吾疑小阮早年名著詞壇驚才絕豔文海壯  
波瀾餘事搓酥滴粉寫閒情細劈烏闌香霏處空明腸  
胃曾把萬花餐三年羈鄂渚含飴詠絮懷想團圓喜  
還來雙鯉遠耐湘寒更喜新編盈寸泣鮫宮淚點珠穿  
還縈念客星浦上抱瑟向誰彈

張大鎔

字禹金  
吳縣人

滿江紅

春日偕友游虎邱小飲酒家醉後題壁

偈仄乾坤何處吐凌雲意氣邀俊侶峯登海湧襟塵暫  
洗可惜雄圖銷霸主更憐香土埋歌妓忽無端懷古暗  
酸心揮悲涕思撥悶須沈醉紅樓畔青帘峙儘接羅  
倒戴放歌聲起檻外驚停鶯燕語壁閒亂灑龍蛇字惹  
冶游士女笑狂奴瞠而視

潘昌

字敬仲長洲人  
諸生有綠棠詞

少年游

紅樓翠幕好芬芳偏自立昏黃脈脈花情微微柳意春  
瘦五分妝闌干倚徧揮紅淚細數漏聲長翡翠衾寒

珊瑚枕冷無計夢遼陽

仇鳳梧

字世臣  
元和人

暗香

梅魂

夜涼月白。在水濱竹外。通些消息。萬籟寂然。縞袂依稀  
渡江驛。約畧窗邊乍到。但飛繞。枝南枝北。待與訴何遜  
當年尋去。又無跡。疇昔夢堪憶。記素服麗人。恁般標  
格。是空是色。將近仍離。渺難卽。應是逋仙逝後。還想返  
故山墳側。怕玉笛吹斷也。欲招未得。

吳

鏡

字未詳新  
陽人諸生

行香子

哀柳

慣被風吹更受煙欺好春殘鶯也猜疑風流意態在在  
都非是白堤邊章臺畔灞橋西攀折何辭飄泊難支  
認江潭倩影依稀而今落莫悔煞當時枉鬪柔腰誇嬌  
眼逞纖眉

黃呈蘭

字秋苑南海人  
諸生有因竹詞

青玉案

海門

煙開蠓鏡風光異好一片繁華地重譯梯航來萬里危  
樓高聳綺窗四敞道是耶蘇寺珍禽怪獸形殊詭異  
卉奇花雜青翠更有佳人誇彼美不施脂粉別饒丰韻  
惜少雲鬟膩

李汝章

字沁碧秀水人  
有菖溪漁唱

掃花游

京口感舊

擲帆幾日早路入南徐小程初駐舊游院宇尙門前不  
改大江東去物是人非壁上還存畫句悄無語對斜照  
半山如薺邨樹重訪修禊處賸寂寞桃根留遲崔護  
纖歌妙舞化荒寒蔓草暗風潛度滿目悲涼又際秋空  
欲暮望前路正煙波遠浮瓜步

鳳凰臺上憶吹簫

彩壁塵昏總帷香冷文闌尙作回環悵晚妝人杳鏡掩  
孤鸞賸有生綃畫影依稀見舊日低鬟凝情久牆花垂

淚庭草浮寒。窗殘半規夜。月透一線蟾光。猶照屏山。  
歎素琴橫几。燈下誰彈。縱使返魂有術。相逢處。也是無  
言難成寐。鄰家又歌大小長干。

仇夢巖

字秋人歙縣人  
諸生有怡軒詞

三姝媚

客游飄泊有懷汪劍潭黃小松集山中白  
雲詞卽用其體

一簾鳩外雨。嘆客裏光陰。白雲誰侶。譜招新聲。把冰絃  
彈斷。旅愁無數。舊隱重招。應笑我。飄零如羽。小立斜陽。  
霜角寒梅。似傳心素。不爲尊鱸歸去。待款語遲留。再  
盟鷗鷺。南浦歌闌。漫驚回。淒悄。此時情緒。雁影含愁。想  
只在蘆花多處。坐閱千帆。縹緲明波綠浦。

高陽臺

秋螢

夜色沈沈雲容黯黯飄然閃爍如銀小扇輕羅撲來易  
委芳塵淒迷野草無多綠甚星星欲亂星辰且看他纔  
上牆頭又下牆根 隋皇舊院今銷歇但秋風禾黍慘  
淡黃昏萬箇宵行獨憐不照歸魂玉鈎豔骨千年恨望  
平蕪只有青燐卻憐他一點微光一點愁痕

又 三江城上晚眺

淺碧涵空新黃匝地莽然萬頃平沙幾點煙螺依微不  
辨人家夕陽未落潮初長捲寒濤一片殘霞忽風來一  
陣征鴻一陣歸鴉 當年豪氣今猶在怎低眉牖下鍛



羽簷牙聽說張騫也曾八月浮槎飄零海國如蓬梗不  
登高不見天涯最傷懷滿目關河滿目蘼葭

浪淘沙

題儲王琴東亭感舊圖集白雲詞

流水自泠泠斷柳長汀向人圓月轉分明欲訴閒愁無  
說處愁極還醒終是未多情杜老飄零暖香十里軟  
鶯聲門掩新陰孤館靜幾度消凝

浣溪紗

揚州讌游追和王新城韻

綠滿湖天碧浪流畫船從不開春秋銷金真箇是揚州  
十里名園何限好二分明月本無愁夜深燈火比樊

樓

浦淮音

字德星金匱人諸生

浣溪紗

槭槭風聲撼井桐  
瀟瀟雨點雜秋蛩  
獨眠人在小窗中  
香裊微烟閒睡鴨  
燈搖殘焰墮金蟲  
者般情景幾家

同

余尙德

字嘯山休甯人有碧水詞

金菊對芙蓉

中秋夜坐月色皎然孤影無聊因成是解

桂蕊流芬永紈織素幾番欸步流連聽綠鬢鄰女私語  
纏綿夜深清露涼於水浸芳叢一片寒煙瓣香燒了巧  
排花果深拜簾前情知夢也徒然念相如多病久客

天邊算吟箋賦筆種種堪憐今宵縱有多情月甚相看  
不似當年疎砧聲裏燈光一點禁甚閒眠

田

林

字未詳  
上元人

解連環

燕子來遲悵然有作

到時何晚語喃喃似說煙程來遠問杏花久矣飄殘正  
苔碧泥香落花千點曲浦平橋一瞬過飛飛又轉恰樓  
頭有女凝妝獨立繡簾初卷韶光爲誰荏苒早蘆芽  
出水柳絲青徧喜舊巢梁上依然得仍與多情主人重  
見怪雨蠻風訴不盡旅愁離怨正谿雲如葉如花賴伊  
碎翦

費

融

字草亭德清人  
有紅蕉山館詞

南浦

寄顧君萊厓

落木漫牽愁。愛澄江、采采芙蓉未老。鴻雁數聲來，蘆花  
際、一色長天如掃。身閒意遠，濡毫自覺臨流好。叵耐別  
懷消、不易博得相思多少。采菱歌起前汀，看閒鷗對  
對浮波去了。想見古桐溪，斜陽外、幾許白蘋紅蓼。離情  
渺渺，徘徊獨坐魚磯悄。曾約尋君君記取，颿挂西風應  
到。

魏攀龍

字松濤  
嘉興人

采桑子

江南二月蠶功起  
蠶子剛萌蠶月初  
晴濃綠陰中戶半  
扃紅閨姑婦辛勤  
甚采采筐盈軋軋  
縲成不覺榴花照  
眼明

更漏子

題顧萊厓清宵聽雁圖

九秋風三更月催促  
棣華消歇閒捲幔  
獨憑闌清暉照影  
單雁飛初宵將半  
叫出傷心一片音  
嘹唳意淒涼離羣  
惜斷行

錢

東

字袖海自號玉魚生錢塘人

鳳凰臺上憶吹簫

爲竹巖離尹題其舊繪雙鬟伴讀圖

筆架珊瑚書裝璜  
瑁當年勤苦芸窗  
問金鑪香燼誰與

添將聽說青燈影裏相伴有蠻姊樊娘休認是夢中幻境雲雨荒唐淒涼彩雲易散千萬縷情絲枉繫柔腸剩零箋斷素費盡思量算只紅襟燕子還記取往昔行藏驚鴻影披圖宛然去也雙雙

滿江紅

送胡眉峯入都時同客揚州

閱徧炎涼原不受世人憐惜況今日揚州何處爲君虛席珠履紛紛徒自炫誰家真是田文宅算暫時拚醉泣窮途成狂籍且莫怪遭歐帛還自著尋韓屐望龍門非遠許騰千尺我亦江干同落魄相逢不屑青衫溼再休題兒女昔時情悲無益

高

桐字雪舫  
秀水人

憶王孫

鴨頭新綠水平堤柳擘晴綿煙縷齊野店無人酒望低  
板橋西恰恰流鶯花外啼

綺羅香

落葉

秋落梧桐煙寒橘柚野色蕭蕭如許捲起西風撩亂漫  
天飛舞才點向紅板溪橋又吹還綠蘿庭戶最難描一  
片淒涼酒醒昨夜打窗處飄零愁煞倦旅南北東西  
萬里有誰留汝古道斜陽自去自來無緒供野竈閒煮  
茶香載寒蛩輕隨波去記樓頭新綠濃時隔江聽杜宇

雷

晚

字蕙樓江蘇華亭人諸生有蘭圃詞

齊天樂

湘秋閣坐月

鶴汀鳬渚秋如水簾櫳玉鈎風定蘭露搖珠桂香糝雪  
作就今宵淒冷白蓮花柄看乍出龍宮團團端正幻境  
眞成一奩萍藻鏡中映盈盈銀漢宛在鵲橋何處是  
空見星影天上霓裳人閒珠髻一樣梳妝工整更深宵  
靜甚拍徧闌干更無人應鐘動鄰庵酒醒還自省

臨江仙

題翁石執師賞雨茅屋圖

世外玉壺天地別森森銀竹堦除憑君結箇小蓬廬雙  
屏清畫掩蝸上紙窗初靜裏會心眞獨得不妨舊雨



生疎滿庭書帶綠  
勻無幾枝花欲倒  
翦燭倩人扶

國朝詞綜補卷十七

無錫丁紹儀杏舫輯

黃定文 一首

顧 揆 一首

張 誠 二首  
補詞

高樹程 二首

李鼎元 二首

馮敏昌 一首

李 威 一首

韋佩金 四首

楊 掄 十一首

潘庭筠 一首

顧 亮 一首

蔣知節 二首

徐大容 一首

陸伯焜 一首

王 鼎 一首

張 槎 一首  
補詞

程瑜二首  
補詞

楊倫一首

李淦一首

惲敬一首

李懿真一首

顧澍三首  
補詞

范永祺一首

馬廷萱四首

周長泰一首

何道生一首

顧敏恆一首

秦恩復一首  
補詞

詹應甲一首  
補詞

朱文治一首

舒位三首  
補詞

劉逢升二首

阮元一首  
補詞

劉鳳誥一首

劉鐸之一首

張錦芳一首

黃定文

字東井鄞縣人乾隆四十二年舉人官松江知府

江城子

重到峽山

六年此地看花時  
醉題詩泝漣漪  
湖海飄蓬曾與夢  
相依不分扁舟今又到  
羞照見鬢成絲  
江梅吹盡柳綿飛  
雨霏霏雁行迷不斷  
青山依舊繞清池  
往事如雲無可問  
雲外月可能知

顧

揆

後改名佺字齊堂元和人乾隆四十二年舉人官海澄知縣

水調歌頭

喜韋君西山回自伊犁卽送入關時在哈密

拍手喜重晤天末故人回  
今宵二分明月照到古輪臺  
滿耳邊笳鼓如聽畫橋笙笛且盡掌中盃  
飲罷送君

去月影度清淮 選樓空董帷寂總蒿萊昔日瓊花爛  
漫回首已塵埃何況茫茫世事幻出白雲蒼狗不樂復  
胡爲寄語遠相待代我報江梅

張

誠

字熙河平湖人乾隆四十二年舉人有鶴丁詞

臨江仙

徐恬波陸心雲招飲

昨宵石上藤蘿月今宵又照池東良朋難得一時逢談  
諧無忌端合醉千鍾 爛漫明燈圍四座透簾花影玲  
瓏觥籌交錯興方濃休辭百罰此會幾時重

東風第一枝

寄金鄂巖比部方蘭坻處士

柳曳殘絲花縈別緒故人相隔雲表只憐一水盈盈已

過九秋渺渺王維裴迪想古盡詞壇吟嘯最好是開徧  
桐花滿地碧雲旋繞還記否當湖一棹風雨夜把杯  
談笑座中還有春橋擊鉢共賡新調蓉城人往怎忍見  
孤墳秋草悵幾度月黑楓林無那夢魂顛倒

高樹程

字邁庵仁和人乾隆四十二年副貢生官教諭

百字令

愿下歲暮

歲云暮矣愛淒清風景紙窗竹屋蘇老襟懷原不讓只  
愧紅塵徵逐蓮子湖明華不山翠幸免窮途哭懷歸未  
得怕看明月如燭也願綠髮年芳青雲路遠快展驂  
驅足壯志銷沈今漸已何暇悲生髀肉歸去來兮身名

料理莫負將軍腹。妻孥歡聚十年書。更重讀。

八歸 冬夜旅感

鑪溫漸減。燈殘將炧。高閣寂靜門閉。消凝最是鄉心杳。  
常共葉聲蕭索。柝聲迢遞。敲枕微吟神欲倦。奈夢影、  
瞢騰還未。訝月地、過盡行人。陋巷犬猶吠。閒數年時情  
緒。追歡排悶。只有黃昏無計。鐘初鐘歇。窗明窗暗。嘗徧  
愁中滋味。認歸期已定。那識前言又成戲。長吁處、萬般  
莫罄。待到朝來。尋思難復記。

李鼎元

字墨莊。綿州人。乾隆四十三年進士。官宗人府主事。

倦尋芳

題永州司馬李虎觀梅梁漁隱

軟塵滾滾吹老鄉心欲避無計好夢江南漾斷一天煙  
水常記園林春二月不堪關塞人千里借丹青把狎鷗  
生計傳來畫裏豈真能卧游消酒如此溪山端合重  
醉試與商量究竟卜鄰何地幾箇蘭舟垂柳外數椽茅  
屋長松底盍歸乎混漁樵足音先喜

金縷曲

闌干

宛轉情何極襯花陰春藏幾許蝶蜂曾識曲象玲瓏呈  
幻影低護青青草色正睡起海棠無力偏共柔腸爭九  
轉便陽烏午影扶難直桃源路一灣隔 始塢鶴步還  
愁入算惟有槐邊蟻度柳邊鶯織月夜縱橫添斷竹羽



客憑虛弄笛早絆住花閒游屐酒點茶痕人去後更誰  
憐粉睡黏塵跡留淺蔭蘸苔碧

馮敏昌

字伯子號魚山欽州人乾隆四十三年進士官戶部主事

天仙子

新構小亭落成

結就小亭形似舸泉石周遮叢竹裏漁歌斷處接樵歌  
斜日墮浮雲破對影三人風月我老去心情耽懶惰  
怕向危流重捩柁竭來宴憩意悠然閒吟坐饒清課讀  
畫絃詩無不可

李

威

字鳳岡龍溪人乾隆四十三年進士官廣州知府

千秋歲

對雨

分蜂時候孤榻閒長晝山雨過輕寒透髮愁潘令改腰  
怯休文瘦午睡醒驚看窗外梅如豆索米長安久只  
是人依舊風意峭雲紋縐萍應池沼滿麥正郊原秀花  
事少鼠姑已殿殘春後

韋佩金

字酉山江都人乾隆四十三年進士官凌雲知縣有夜雨珠簾詞

憶王孫

碧流宛轉漸通潮霜柳微黃兩岸飄緩緩西風信槩搖  
石城橋一寸秋魂水上消

憶秦娥

蘆笳葉吹來清鏡盈頭雪盈頭雪鶯飛草長去年時節

相思歲歲音塵闕銷魂不是而今別而今別落花流水  
曉風殘月

浪淘沙

新水綠楊灣紅藕香殘掠波燕子乍飛還歌板酒旗無  
恙在別後湖山風雨短篷寒零落漁竿孤他明月太  
清閒夜夜無人流照徧舊日闌干

一萼紅

夢迢迢被疎鐘敲破落月半窗斜簾裊餘香燈飄殘焰  
幾曾真箇還家想舊日美人橋畔漸西風開到白蘋花  
老屋城隅松煙一縷正熟新茶黯黯青衫淚溼也不

須商婦重按琵琶往事無痕流年似水青青兩鬢將華  
乍蓮漏丁丁聽徹擁單衾涼雨撲蟬紗又早雞聲報曉  
驚起棲鴉

楊

掄

字方叔號蓮趺金匱人乾隆四十三  
年進士官天台知縣有春草軒詞

浣溪紗

路轉風迴石徑斜小橋流水那人家滿身香霧點松花  
柳弱正眠蠶正起筍尖初出韭初芽離愁如絮繞天  
涯

憶王孫

和鄰城旅店壁間韻

亂山無主隔前溪水自東流我自西柳外橋邊住馬蹄

意淒迷芳草連天一望低

河傳

題瑞和女姪倚竹圖

綠淨碧映回廊曲徑裏韻玲瓏捲簾花影逗春紅香濃  
雲鬢鬆天然澹竚蘭情悄塵不擾翠袖新寒早無言  
斜倚玉闌前條然暑風涼月天

淡黃柳

九日同人龍山秋禊待月而歸分韻得瀉字

溪山入畫秋意真瀟灑暝色空濛煙欲化柳外青帘低  
亞寒葉吟風舞香鷗碧山社依然古亭榭提往事等  
飄瓦問何人筆底春濤瀉笑插茱萸好扶殘醉愁聽城  
頭鼓打

祝英臺近

九秋望日訪卞玉京墓同人分詠得影字墓在慧山祇陀寺錦樹林

碧雲窩黃葉徑古寺一聲磬秋滿空山愁緒暗相引可  
堪蔓草淒迷香魂何處添多少雨昏花暝萬千恨只  
恨地老天荒驚鴻杳無影玉已成煙春夢幾曾醒試看  
半壁斜陽霜林似錦怕鳳子歸來難認

離亭燕

晚泊高淳湖口

蕩漾湖光山色風景早如江北荻筍蘆芽春正嫩岸柳  
絲絲如織一片好汀洲賸有野鳬千百西下夕陽寒  
白東望暮雲凝碧輪指水程原不遠總算天涯行客處  
處是長亭離恨誰知端的

木蘭花慢

花朝簡陳竹士

喜花朝到了記生日有人同

謂君配王梅卿夫人

正淑景遲遲輕

陰漠漠雨漬晴烘剛逢一雙社燕想歸來還認舊簾櫳

挽住天仙飛珮忍教長恨西東

偎紅切莫再飄蓬把

酒祝東風倚秦嘉鏡檻年年歲歲春意玲瓏吳儂幾多

豔福海棠巢直是蕊珠宮定有鵲情蝶思好詞勾惹驚

鴻

齊天樂

眼鏡

眼前便是光明藏依然那時年少有影雙圓無花並蒂

閣住鬢絲輕巧纖翳

作平

淨掃怪隔一層雲轉增分曉幸

未深深比量依約近寅卯  
當年曾見古道靜觀還自  
得和月幽抱青白徒翻妍  
媼莫辨短處偏逢嘲笑今番  
了了恍世界琉璃頓消煩惱  
能識連環鏡中人更好

花心動

蜂

早趁生涯鬧朝衙楊花正飛晴晝煙染露滋白嫩紅嬌  
卻喜年年依舊纖腰知是春前瘦招伴侶無端僂僂雕  
闌畔枝頭正放幾回相就  
羨爾輸將恐後玲瓏甚重  
房暗通虛牖含盡苦辛甜到中邊剛好一冬厮守尋芳  
也有癡蝴蝶問秋老逍遙能否長傍著空梁燕巢似斗

胃馬索

曉起渡河向蘭山進發用竹垞韻



正堪憐。露宿沙餐。不教住。飄綿舞絮。有愁都上眉峯聚。  
東蒙近接。岱雲高聳。倚馬揮毫同誰賦。聽渡頭。淌水聲  
喧。遠繫孤舟。沒篙櫓。羈旅。山程迢遞。故人千里。就裏  
相思向誰語。欲寫蠻箋。馳寄征鴻。遙隔吳江雨。三盃白  
墮。一枕黃梁。夢後原知般般苦。算別來。幾多離恨。換得  
新添斷腸句。

摸魚兒

花魂

最關心。數花風過。落紅陣陣如雨。叢鈴尙解零星語。爲  
甚暗添酸楚。春欲去。賸一點靈犀蕩漾。鴛鴦浦。尋芳早  
誤。趁淡月籠煙。輕雲蘸水。好認再來路。千般慮。茵溷

何從自主曇華終仗超度粉魔香劫尋常事埋恨幾堆  
黃土須省悟便蝴蝶灰飛未算長生庫騷經漫註縱翦  
紙能招懸旛待引有夢枉凝竚

潘庭筠

字德園錢塘人乾隆四  
十三年進士官御史

百字令

顧菴厓囑題鄧尉探梅圖卽次其自題韻

虎山橋外憶東風撲面疎香幾樹比似西泠花較豔只  
欠胎禽閒步銅井微霜石湖冷月猶向梢頭露吟情如  
昨不忘光福歸路聞道金粟詩人玉山社長也愛尋  
春去一幅溪藤行看子寫出冰朝雪暮長耳閒停短鞦  
緩策更續堯章句小紅誰贈玉龍寒夜低度

顧亮

字幔亭無錫人乾隆四十四年舉人官山陽教諭有焚餘詩稿附詞

菩薩蠻

蘭屏半掩疎簾月雲鬟斜亸香飄雪尊酒祝花前花開  
勝舊年 陌頭芳草碧別後離懷結數盡北歸鴻春波  
煙萬重

蔣知節

字秋竹鉛山人乾隆四十四年舉人官教諭

洞仙歌

題吳蘭雪草堂尋句圖

浣花溪水帶春星歷歷澹沱雲光逗眉月到昏黃欲暝  
虛白將生搔短鬢好續玉臺新集 春深寒料峭獨擁  
吟肩花底徘徊境清絕不是恁推敲重入長安爭便得

才名如炙間待築針神繡詩樓可博得蘭閨那人珍惜

又 又題牛坳吹笛圖

誰家牧子下斜陽樵徑短笛聲清四山應任吹來天籟  
畧帶宮商渾不減五月落梅風韻 知音桓子野傾耳  
風前一樣青雲動幽興懸簿徧高門挾瑟吹竽難陶寫  
騷人情性便白石南山甯生歌也不令斯時溷人清聽

徐大容

字莪沚江南華亭人乾隆四十四年舉人有復堂詩鈔附詞

金縷曲

題友人照

咄咄休多說笑先生鷓鴣裘傲西風吹葛野屋綠杉無  
恙在白板雙扉堆雪總莫禁愁心如髮碌碌屠沽何足

算踏青山長笑峯頭月羞浪鼓傍門瑟 酸醎與俗原  
難別但年來著書閉戶時宜不合好向畫圖留面目認  
取柔情俠骨任脫帽狂呼奇絕伏櫪猶然悲老驥且酣  
歌醉拂雙龍鐵匣底吼雪花裂

陸伯焜

字璞堂青浦人乾隆四十五年  
進士官浙江按察使有蝶庵詞

### 洞仙歌

曲瓊低控愛明河遙映一桁犀屏露華冷漸慵攜雀扇  
薄整蟬紗妝卸也消受綠窗人靜 微醺先避酒試拂  
文楸玉子頻敲看誰勝爭劫掩雙奩慣倚嬌憨燈影下  
倩波愈靚聽秋點聲聲夜將闌悔拋卻鴛鴦繡衾香凝

王

鼎

字條山婁縣人乾隆四十五年舉人

金菊對芙蓉

張遜亭席上用汪秀峯韻

潮漲龍潭林疎超果攜筇閒踏秋暉悵木樨香裏  
冷僧稀清華畢竟家園好囑晚來重款柴扉菊花攢蕊芙蓉吐  
豔景簇漁磯那許舊侶睽違愛江南浙右譚塵  
交揮怡霜螯充饌雀美鱸肥山陰酒醖觥爭泛倩吟箋  
畫筆酣飛筵收月起斜橋左右燈火人歸

張

槎

字香賓丹陽人乾隆四十五年舉人官新淦知縣有差木軒詞

菩薩蠻

冰蟾斜透蛛絲隙  
細桃扶影當窗立  
良夜正迢迢  
隔樓

何處簫 啼鴉聲不絕一枕江南憶游子苦愁多玉人  
愁奈何

程

瑜

字去瑕仁和人乾隆四十五年  
舉人官義烏教諭有小紅樓詞

菩薩蠻

芳塘驚起鴛鴦宿春波一片粼粼綠別恨暗隨潮輕帆  
飛夢遙 漏沈清夜午鐙語人無語怕近合歡牀衾餘  
前度香

一萼紅

悄黃昏早安排腸斷無語惜惺惺步澀遲連眠妨伴柳  
帶圍添困花身間消得幾番花褪歎飄零枉費種桃心

春色難關東風不解一段幽情  
應悔寒漿誤飲卻慊  
慊疑病心捧眉顰窺月愁濃隔花緣淺讓他三五宵征  
休認是雲慳雨吝夢分明昨夜又何曾待向浣紗石畔  
綠水湔裙

楊

倫

字西禾陽湖人乾隆四十六年進士官荔浦知縣有九柏山房集

虞美人

秋夜納涼

差池小燕迎風舞擬聽梧桐雨溼雲漸斂彩雲收賸得  
瀟瀟數點過南樓  
飲闌官閣清吟夜冰簟涼生乍露  
華如水滴來輕待聽農歌處處慶秋成

李

淦

字春浦秀水人乾隆四十八年舉人



摸魚兒

滿迴塘青莎紅蓼江天最好秋暮鯉魚風起鷗波闊樂  
事全輸漁父披尺素羨騷客攜橈獨占滄洲趣乘潮客  
與想短笠煙浮輕蓑香細一棹渺何處蓬窗底料得  
閒吟漁具松陵更續新句分明結就千絲網網得銀刀  
如許君且住可許我移將小艇停沙渚共傾綠醕儘紫  
蟹凝膏玉鱸膾雪爛醉不歸去

憚

敬

字子居陽湖人乾隆四十八年  
舉人官瑞金知縣有簡塘詞

阮郎歸

蝶

心情不耐月兒清輸他深夜螢竹閒香霧幾曾停飛來

三兩星 穿繡檻度銀屏階前路慣經輕輕無礙護花  
鈴西風枝上聽

李懿真 字漁衫江蘇通州人乾隆四十八年副貢生官銅陵知縣有退紅詞

憶漢月

杜宇聲聲啼曉催得春歸太早半庭飛絮一簾風牘無  
多落紅休掃玉樓人易老忍虛度年光草草錦箋寫  
徧斷腸詞悵天際去鴻來少

顧

澍 字伴藥錢塘人乾隆五十一年舉人官蘄州知州有金粟影庵詞

菩薩蠻

芭蕉雨過秋雲綠鳴箏低按伊涼曲消受晚風涼白蓮

花正香 殷勤重勸酒袖捲纖羅皺紅豆莫輕拋天涯  
魂易銷

阮郎歸

垂虹亭畔艤蘭橈柳絲青覆橋春風引出玉人簫聽時  
魂暗銷 尋舊約趁芳朝勝游知未遙還期覓醉解金  
貂酒帘相向招

南柯子

春雨新霽招同人賞花湖上

日嫩穿窗薄雲疎出岫輕小樓簾卷雨初停又聽隔牆  
紅樹轉流鶯 因約嬉春伴相將載酒行看花不必待  
清明知否一春難得是新晴

范永祺

字莪亭鄞縣人乾隆五十一年舉人

祝英臺近

柳煙昏桃雨暗  
厯落水村暮碧草芊綿繡徧踏青路可  
憐慘綠愁紅分明在眼忍忘卻流鶯聲度  
魂消處偏  
是一縷游絲飛花漫縈住  
聒耳啼鵲又繞夕陽樹  
春來  
斷盡柔腸揮殘清淚  
春去也怎禁他去

馬廷萱

字友桂號鑑泉長汀人乾隆五十一年舉人官南河同知

南樓令

川暝暮雲平  
寒潮帶月生  
渺江天一色空  
明山外有山  
千萬疊遮不斷  
望鄉情  
風正片帆輕  
中流自在行  
謝

姮娥遠伴孤征還想深閨眠也未應屈指數歸程

西江月

幾折雕闌斜繞四圍斗帳低垂露葵花放不多時好箇  
嫩涼天氣 新月微窺簷角輕風悄颺簾眉小鬢報道  
遠人歸怪底銀釭雙穗

阮郎歸

關河天遠感雙眸玉驄何處留烏衣重到認簾鉤斜陽  
紅滿樓 纔幾日已新秋銀河澹不流寒蛩日夜替人  
愁空堦絮未休

滿江紅

朱仙鎮謁岳忠武祠鎮爲當日奉詔班師處祠中有柏枝皆南向門內亦如西湖墓

前跪鐵人四

古柏盤拏聽日夜靈風颯颯怪此日枝猶南向恩偏易  
絕三字居然將獄定兩宮從此無人說歎辱王先自壞  
長城何肝臆時事改空嗚咽祠宇在應憑式想當年  
父老攀轅泣血千古興亡關氣運一家兒女矜忠烈尙  
憎他鐵像跪門前汚神闕

周長泰

字綺村江蘇通州人乾隆五十一年副貢生

連理枝

一夜梨花雨綠漲銀塘渡引起游情喚將舴艋隨流行  
去看鵓鵲鵲戲波心碎浮萍無數雁齒橋邊路簾

幕輕陰護幾日重來垂楊影裏雜花滿樹間前裏人去  
幾多時奈流鶯不語

何道生

字蘭士靈石人乾隆五十二年進士官九江知府

畫堂春

張瘦銅中翰有感近事賦詞寄慨余亦繼聲

重陰漠漠草連空鶯喉學嘯還慵荒原纔見野桃紅又  
被塵封一霎朱顏黃土年時不合相逢落花容易怨  
東風說也惺忪

顧敏恆

字立方無錫人乾隆五十二年進士官蘇州教授

如夢令

長日東風院宇又變輕陰欲雨倦倚小闌干滿地落花

飛絮飛絮飛絮正是豔陽時序

秦恩復

字敦夫江都人乾隆五十二年進士官編修有享帚詞

一斛珠

題織雲女史畫蘭紈扇

曉來殘醉佯羞頻問醒還未惱人情態騰騰地一種閒  
愁排遣渾無計數朵芳蘭香竟體輕紈染就憑誰寄  
箇中藏得些兒意欲說同心說也非容易

詹應甲

字鱗飛吳縣人乾隆五十三年舉人官漢陽知縣有清江詞

菩薩蠻

香徑斜通第幾橋  
鈿車羅帕互相邀  
移家好近海棠巢  
蓮子東西南北葉  
柳枝高下短長條  
只愁無地著魂



銷

朱文治

字少仙餘姚人乾隆五  
十三年舉人官學正

金縷曲

題文后山上舍所藏漢銅三斗鎗拓本

炎漢荒淫久數銅仙幾回淚落銅鎗新就脣載元延鐫  
小篆自詡器非求舊奈專寵昭陽時候啄盡王孫仍瘦  
損想大官厨已空諸有誰較量幾何斗曹家拓本流

傳後

謂種梅  
司訓

笑詞人斤斤考索重於登豆我羨停雲真

好古不惜萬錢能購將玉印收藏成偶

后山先購趙飛  
燕玉印並藏之

轉悵留仙裙化去待香魂飛到鴛湖口如月影復圓又

舒位

號立人北平人乾隆五  
十三年舉人有琴尾詞

御街行 蒼苔

西園盡日重門閉。又綠到、闌干底。多應青女玉釵寒。卸  
下雲鈿翠髻。曉來尋徧。雨肥風瘦。蝶去蟲來地。天涯  
小草芳無際。有一種、愁儂意。遲他行跡到門前。舊徑深  
深難記。黃昏相近。蒼茫獨立。捏上鞋弓未。

蕙蘭芳引 秋草送別

斜日短亭。馬蹄綠。踏翻秋色。看一路天涯。難繫遠人去  
跡。野梅官柳。當此際。盡無消息。向漢宮吳苑。只有黏天  
霜白。斜憶裙腰單。憐袍袖。別恨遙隔。況八月西園。黃  
蝶欲飛不得。咸陽道上。衰蘭送客。歸去來。休負暖風薰。

陌。

疏影

落葉

青燈促漏聽瑣窗點點風雨依舊一葉秋聲飛入誰家  
知他好夢難又東君不到梧桐院有幾處銀牀鴛鴦想  
輓轡汲井人歸擁起夜寒雙袖無奈開簾細數小園  
曲徑畔紅掃鸞帚眼底關山只有歸鴉記得門前烏桕  
分明北渚微波下渾不似柳梢春後等再催九月疏砧  
冷到寄衣時候

劉逢升

字南吉號芝圃同安人乾隆五十三年舉人有生芝草堂詩存附詞

眼兒媚

蓮衣吹墮鏡雲迷惆悵蝶來遲朱闌十二紅橋廿四立  
了多時 當時枉織鴛鴦錦還是苦凝思最難忘處初  
三月約下九星期

臨江仙

戍鼓聲停燈閃閃依稀報過初更眼前景物太淒清帳  
敲花一角闌摺月三層 漸逼疎篷風淅淅客愁和酒  
俱醒舊歡新夢總如塵卻從孤枕上重聽夜潮聲

阮元

字芸臺儀徵人乾隆五十四年進士官大學士謚文達

百字令

重葺曝書亭爲圖以紀卽和竹垞集中竹垞圖韻

宦三年矣幸舊時方勺宅今猶泊靜志齋荒秋葉冷此

際琴絲誰託鈿軸都消舫醞難問付與啼鳥樂草堂碑  
在夕陽無語西落 又見聯屐吟詩連筒載酒畫裏閒  
商酌依約垞南三徑好染筆曾題虛幙竹樹重栽菊泉  
堪薦何用尋幽壑秋燈書罷數聲城上清角

劉鳳誥

字金門萍鄉人乾隆五十四年進士官侍郎

御街行

南掌進象時屈八旬聖壽

十年例貢 皇恩許萬里來無阻熊熊南極壽星明輝  
映瑤光齊吐洗經香海導經丹徼躡到中華土 太平  
真象憑看取天闕雍容步騶虞 仁育上林多未要搗  
家調拊氍巾領飾珠璫耳玩七就朱纓組

原註南掌貢道遙遠乾隆

七年定爲十年一貢其  
老搗夷民俗呼搗家

劉鑲之

字沁芳諸城人乾隆五十四年進士官尙書

霜天曉角

題顧菴厓清宵聽雁圖

宵來岑寂獨坐腸應直天外有聲入耳風葉裏小窗側  
謝家幽夢隔煙草悽如織一種秋情難繪孤雁影下  
寒碧

張錦芳

字藥房順德人乾隆五十四年進士官編修有述虛閣詞

百字令

遠山何似似雨餘雲破一般天色漠漠春陰低貼水乍  
暖還寒時節十里波平四圍草長并作傷心碧閒鷗溶

漾數聲驚起長笛 待向蘇小門前莫愁堂畔尋取前  
游跡六柱船輕雙槳捷幾許風流褰屐桃葉迎來竹枝  
歌罷又是江天夕韶年易老有人應念歸客